

Rhifyn Deg
HYD 2023

BOARD INSIGHTS



GIG
CYMRU
NHS
WALES

Iechyd a Gofal
Digidol Cymru
Digital Health
and Care Wales

Croeso i Gipolwg ar y Bwrdd. Fel aelodau Bwrdd yr Awdurdod Iechyd Arbennig, rydym i gyd yn teimlo ei bod yn bwysig rhoi'r wybodaeth ddiweddaraf i chi am rywfaint o'r gwaith rydym yn ei wneud ar draws y sefydliad ac yn GIG Cymru. **Daw'r rhifyn hwn gan ein Haelod Annibynnol.**

Marian Wyn Jones

Annwyl gyfeillion,

Roeddwn wrth fy modd pan ofynnwyd i mi rannu Cipolwg ar y Bwrdd gyda chi i gyd y mis hwn. Mae'n amserol gan ein bod newydd gynnal ein hail Gyfarfod Cyffredinol Blynnyddol ers sefydlu DHCW fel Awdurdod Iechyd Arbennig, ychydig yn hwyrach nag arfer eleni oherwydd y cyfnod archwilio estynedig ar draws GIG Cymru.

Roedd yn gyfle gwych i fyfrio ar bopeth rydym wedi'i gyflawni yn ystod y flwyddyn ariannol ddiwethaf ac yn wir, i ystyried yr heriau dros y flwyddyn i ddod. Mae'r adroddiad blynnyddol ar gyfer 2022/23 bellach ar [y wefan](#) ac fel y gwelwch, mae'n rhoi trosolwg clir o bwy ydym ni, beth rydym yn ei wneud ac yn hollbwysig, mae'n arwydd o'r trawsnewid yn y ffordd yr ydym yn defnyddio digidol i gefnogi iechyd a gofal Cymru. Byddwch hefyd yn dysgu am ein sefyllfa ariannol fel sefydliad statudol, ein gwasanaethau, a'n cynlluniau ar gyfer y dyfodol. Yn fwy na dim, roedd yn gyfle i'r Bwrdd ddiolch i gydweithwyr ar draws y sefydliad am eich holl waith caled yn ystod y flwyddyn ddiwethaf ac yn enwedig y rhai a helpodd i baratoi'r adroddiad blynnyddol a'r cyfrifon. Maen nhw'n werth eu darllen.

Daw hyn ar gyfnod o her enfawr i ni. Mae'n fater o gofnod cyhoeddus bod GIG Cymru yn rhagweld diffyg ariannol sylweddol ar gyfer diwedd y flwyddyn wedi'i effeithio gan chwyddiant, pwysau ar y gweithlu a gwasanaethau. Mae'n amlwg nad yw'r sefyllfa ariannol sylfaenol yn gynaliadwy. Fel sefydliad sydd wedi cyflawni cynllun cytbwys, gofynnwyd yn awr i DHCW gyflawni cyfres o arbedion uchelgeisiol i helpu sefyllfa ehangach teulu GIG Cymru. Cyfarfu'r Bwrdd sawl gwaith yn ystod yr haf i gytuno ar ei ddull yn dilyn adolygiad gan y tîm Gweithredol o'r holl wariant heb ei ymrwymo. Er ein bod yn dal i aros am ymateb Llywodraeth Cymru, mae'n anochel y bydd yn heriol inni o wybod bod gan ddigidol y pŵer i drawsnewid gwasanaethau, gan arwain at fwy o effeithiolrwydd ac effeithlonrwydd ar draws GIG Cymru. Ac mae angen inni barhau i gyflwyno'r achos hwnnw.

Fel Cadeirydd y Pwyllgor Archwilio a Sicrwydd, gallaf eich sicrhau y byddwn yn ymgymryd ag archwiliadau dwfn i adolygu'r modd y cyflawnir ein cynlluniau. Dywedwyd yn ein cyfarfod pwyllgor diwethaf fod Asesiad Strwythuredig DHCW eleni wedi hen ddechrau, ac edrychwn ymlaen at adolygiad diweddaraf Archwilio Cymru o'n trefniadau corfforaethol, bod y defnydd o'n hadnoddau yn effeithlon, yn effeithiol ac yn ddarvoudus.

Yn y cyfamser, rydym yn parhau i ganolbwyntio ar ddatblygu strategaeth mewn nifer o feysydd hollbwysig. Yn ein sesiwn Datblygu Bwrdd ddiwethaf, buom yn ystyried y Strategaeth Gofal Sylfaenol ddrafft a arweiniwyd gan Sam Hall, Cyfarwyddwr Gwasanaethau Digidol Sylfaenol, Cymunedol ac Iechyd Meddwl, a ddylai yn y pen draw helpu i ddiwallu anghenion newidiol pobl Cymru. Adolygwyd y dull gweithredu arfaethedig ar gyfer strategaeth hirdymor y sefydliad a chlywsom gan Brif Swyddog Digidol Cymru ar sut y gall DHCW

helpu i gefnogi gweithrediad Strategaeth Ddigidol Iechyd a Gofal Llywodraeth Cymru.

Yn rhinwedd fy swydd fel Hyrwyddwr Aelod Annibynnol y Bwrdd dros y Gymraeg, roedd yn bleser ymuno â chydweithwyr mewn cyfarfod ag Efa Gruffydd Jones, Comisiynydd y Gymraeg, wrth iddi ymgysylltu â rhanddeiliaid ledled Cymru. Cafodd ei briffio gan Ifan Evans, Cyfarwyddwr Gweithredol Strategaeth DHCW a Hyrwyddwr y Bwrdd Gweithredol, am ein rôl statudol a'n blaenoriaethau strategol, gan amlygu ein hymrwymiad i greu amgylchedd priodol i staff, dysgwyr a rhanddeiliaid sy'n siarad Cymraeg ddefnyddio'r iaith.

Ac yn olaf, hoffwn achub ar y cyfle hwn i ddiolch i'r staff yng Ngogledd Cymru am eu croeso pan ymwelais â Swyddfa'r Wyddgrug. Roedd yn agoriad llygad clywed am eu cyfraniad i waith DHCW ac am y cyfleoedd a'r heriau sydd yno. Diolch yn fawr!

CIPOLWG AR Y BWRDD

 @IGDCymru

Marian Wyn Jones

Gan ein Haelod Annibynnol -
Independent Member

